

# Prezident Samarqand xalqaro aeroportidagi qurilish ishlarini ko'zdan kechirdi



O'zbekiston Prezidenti Shavkat Mirziyoyev 15-aprel kuni Samarqand shahriga keldi.

Ulkan buniyodkorlik ishlari bilan tanishuv Samarqand xalqaro aeroportidan boshlandi. Davlatimiz rahbari 2019 yili viloyatga tashrifi chog'ida ushbu "havo bandargohi"ni modernizatsiya qilish bo'yicha ko'rsatmalar bergen edi.

Loyiha doirasida yangi terminal, uchish-qo'nish yo'lagi, turargoh va boshqa ob'ektlar barpo etilishi belgilangan. Bugungi kunda uzunligi 3105 va eni 60 metr bo'lgan uchish-qo'nish yo'lagi qurilishi tugallanib, yoritish-signal chiroqlari va aeronavigatsiya uskunalari o'rnatilmoqda.

Prezident dastlab xalqaro aviatsiya standartlari asosida qurilgan uchish-qo'nish yo'lagini ko'zdan kechirdi.

Yangi terminal zamonaviy dizaynga, bir soatda 800 nafar yo'lovchiga xizmat ko'rsatish quvvatiga ega bo'ladi. Ilgari bu ko'rsatkich 400 nafar edi.

- Odamlarga qulaylik yaratish asosiy maqsad bo'lishi kerak. Buning uchun "aqli texnologiyalar"ni qo'llash, xizmatlarni arzon, sifatli, tezkor qilish zarur, - dedi Shavkat Mirziyoyev.

Turli kattalikdagi samolyotlar uchun 24 ta turargoh barpo etilmoqda. Shundan uchtasi "havo kemalari"ga muzlashga qarshi ishlov berish uchun mo'ljallangan bo'ladi.

Aeroportda kargo xizmati ham yo'lga qo'yildi. Davlatimiz rahbari bu masalaga alohida to'xtalib, yuk tashish raqobatbordoshligini oshirish bo'yicha ko'rsatmalar berdi.

- Kargo barqaror va manfaatli bo'lishi uchun doimiy yuk kerak. Buning uchun samolyotlarga xizmat ko'rsatish, yuklarni ortish va yetkazib berishni arzon va tez yo'lga qo'yib, boshqa aviakompaniyalarni jaib etish zarur. Bundan tashqari, viloyatda eksportbop meva-sabzavotlarni ko'paytirib, ularni shu kargo orqali

jahon bozoriga chiqarish mumkin, – dedi Prezident.

Yangi aeroportni joriy yil sentyabrda foydalanishga topshirish rejalashtirilgan. Shundan so'ng, u "ochiq osmon" rejimida to'liq ishlay boshlaydi. 1000 kishi ish bilan ta'minlanadi.

Samarqand xalqaro aeroporti 1967-yilda qurilgan.







Orzbekiston Respublikasi Prezidentining  
MATBUOT XIZMATI



*Manba*